

5

ORATIONES  
IN LAVDEM  
EXCELLENTISSIMI PRINCIPIS  
ANTONII MARIAE  
BVCARELI  
MEXICANI PROREGIS.

QV A S

IN REGIA PONTIFICA MEXICANA ACADE-  
MIA PROTULIT FRANCISCUS ANTONIVS MAR-  
RUGAT, ET BOLDVIVS, SEMINARII CONVICTOR,  
PRIVSQVAM DE LOCIS THEOLOGICIS  
SERMONEM INSTITVISSET: NIMIRVM, CVM AV-  
REVM VOLVMEN A CLARISSIMO CANO ELV-  
CVBRATVM TRIBVS DIEBVS DEFENDERET.



---

( D. L. D. R. )

MEXICI APVD D. PHILIPPVM ZVNNIGAM, ET ONTIVEROS  
TYPOGRAPHVM.





## ORATIO PRIMA.

**E**GO vero praestantissimum, atque egregium volumen, quod serae posteritati maximum Hispaniae ornamentum Canus adeo foeliciter consecravit, non tam mihi laudis ambiendae, quam vobis operis commendandi, in hac optima sapientissimorum virorum corona, hodierna die, binisque posterioribus sum equidem defensurus. Sed quoniam more, institutoque à maioribus nostris receptum est, ut cuius nos tutelae nostra omnia commitimus, vel virtutem, vel gloriam laudibus extollamus ornatissimi Viri, illustrissimi Principis, Maximique Proregis ANTONII, scilicet, MARIAE BVCARELI immortalia merita, priusquam operi accingar ¡Proh Deus! ¡Quantum onus! oratione complectar.

¡Qui

Qui tamen, Auditores amplissimi,  
vel ab ipso Demosthene fieri posset ut  
apud vos, aequos rerum aestimatores,  
tot, tam praeclara, & omni praeconio  
digna, si minus verbis suis affatim exor-  
naret, strictim omnia, sed arctis tamen  
limitibus comprehenderet? Nam si  
quae domi, militiaeque excellentissimus  
ille Dynasta gesserit: si quae rebus cum  
publicis, tum privatis utilia, si quae  
magna, eximia, ab invidisque oblivioni-  
bus libera, is referat, qui virtutem, ani-  
mique ornamenta memoria colat, dies  
(mihi credite) illum deficiet. Itaque ne  
facinorum multitudine (quae uberio-  
rem certe desiderat orationem) peni-  
tus obruar; hodierna die, Viri amplissi-  
mi, non de illius animi magnitudine, at-  
que praestantia, non de integritate, &  
prudencia, non de maturitate, & in ge-  
rendis rebus solertia, nec de gravitate,  
& consilio mihi loquendum est. Haec  
enim tum cum & generis, & vitae for-  
titudinis documenta vobis exponam, ni-

si à me, quo decet eloquentiae ornatu,  
ac nitore funditus illustrentur; veterem  
tamen illorum gloriam, amplitudinem,  
splendorem in lucem proferam.

Age vero, & quia dicendi praefi-  
nitum est tempus, non omnia quidem  
ornatissimum Principem spectantia; sed  
quae virum in litteras satis devexum,  
de illisque optime meritum comitantur,  
ea sunt (¡Fer opem Deus immortalis!)  
breviter recensenda. Vereor tamen ne  
si libenter his me, uti verborum uberta-  
tem affectem, plane concedam, hones-  
tissimi Viri cuius animus longe est ab  
assertationum illecebris, offensionem  
incurram. Sed pace tua, Princeps ex-  
cellentissime, pace tua aliquid de te  
tanquam absente dicam.

Equidem ita sentio: te utpote litte-  
rarum praesidio natum, nedum in cam-  
po, bellicisque negotiis instructum esse,  
sed in Minervae etiam tropicis enutri-  
tum. Neque enim te multiplices curae  
neque maximarum rerum administratio,  
neque



neque rei etiam qua publicae, qua privatae negotia à terendis, volutandisque aliquorum scriptis, hisque celebrioribus abstrahunt. Quod sane experiuntur illi praesertim, apud quos iam diutissime commoraris. ; Quid? ; Quod sapientes impense colis? ; Quod ipsorum iudicia expectas, & qua tibi incedendum sit in commisso munere, si quae se sa. offerunt tricae, ac difficultates ab his inquiris?

Multa equidem praetereo digna mediis fidiis Isocrate, aut Homero, si mamvis egregio buccinatore. Sed eam vero, quam in studiis fovendis alacritatem nuper experti, & mirati sumus, ignavi esset, ac socordis hominis praeterrere. Nam cum Mexicani Proceres in curam elegantiores litteras statuendi diligentissime incumberent; omnem operam diligentiam, & quod magis optandum esset opem tuam, ac favorem, ut Americani nominis existimationi, ac famae consuleretur, impensurum te libenter spopondisti.

;O

¡O ingentem litterarum amorem, at-  
que observantiam! ¡O praeclarum om-  
nibusque saeculis celebrandum studium!  
¡O eximium, nobilissimi, & generosi  
Principis animum!


Perge, perge Vir ornatissime macte  
que esto litterarum amore, quae cum ti-  
bi cordi sint, maximeque delectent; non  
est quod pluribus elucubratisimum  
opus auspiciis tuis consecratum, iterum  
tibi, atque iterato commendem. Sed  
quia illud excepisti, quae tua est huma-  
nitas, Princeps excellentissime, meque  
etiam nomine tuo, ac clientela beasti  
gratias habeo tibi immortales. Unde  
tuam in me comitatem, benevolentiam,  
lenitatem omni observantia colam,  
fide, memoriaque sempiterna.

**DIXI.**









## ORATIO SECUNDA.

**H**Esterna die, Viri amplissimi, antequam me in disputationem dedissem, suavissimum, ac prae caeteris humanissimum Principem litterarum optimum assertorem summis laudibus, ut par erat, summoque etiam opere commendavimus: hodie vero, & avitae fortitudinis documenta, & facinora eius, militiae perpetrata, qua soletis animi contentione, ac benevolentia percipite.

Primum autem Parthenopes, & Siciliae potentissima regna, quorum ille interfuit expugnationi, vim, robur, alacritatem, fidem, caeterasque bellatorum dotes, quibus inclaruit, testata omnia posteris reliquerunt.

Testem appello te, armorum decus, atque ornamentum Italia, cuius in castris ille de hoste triumphavit: testem, inquam,

quam, appello te. Quid enim in Bituntino praelio nisi dignum strenuo milite, aut pugnacissimo Imperatore praestitit? Quod in munitissimarum arcium obsidione non dedit, vel virtutis, vel industriae militaris specimen? In quot etiam vitae discrimina apud Allogobres non se immisit? Quot pericula non adivit? Quot? Sed quid vos remoror? Cum in tanta rerum copia, pluribus consulto supersedendum sit, ne longius fortasse quam moris est, nostra excurrat oratio. Ergo. Quid ille cum Tanarum traiceret? Quid cum Dentona vel obsessa, vel demum expugnata est? Quid praeterea in Statiolorum Alexandria, aut in Foro denique Fulvii gesserit? licet invitum, equidem praetermitam: at quantum illud quam etiam inclitum, omni-que laude dignum existimetis, vos Patres, quibus acre sane iudicium est, tacitis animis penditote.

Interea tamen, & Parmensis ager, & Crotoneum, & Placentia loquentur; audire

prae-

praeterquamquod apud Eridanum, Ba-  
riam, Liguriam, Niciam, Lusitaniam  
tandiu excellentissimi huiusce Principis  
gloria, et fama quae perennabit, quandiu  
suis armis, constabit honos. Etenim ille  
cum exercitus à Nicaea recesisset, Tri-  
bunus Militum nuncupatus, si non om-  
nes animi praestantia antecelluit; at cer-  
te cum primis Equitum de palma cer-  
tauit.

Sed, postea quam victoriam, hosti-  
bus superatis, Hispani reportarunt, so-  
luto bello, animisque sedatis, ut Equi-  
tum turmas recenseret delectus, om-  
nium plausu recensuit. Ut ora Illiberi-  
tana Instraret à Rege missus, accurate  
lustravit. Ut loca, situsque designaret,  
queis valida propugnacula adversus  
Mauritanos sternerentur, regio item  
iussu arcesitus, optime designavit.

Atque in his caste, integreque ver-  
satus, nedum Hispaniae finibus, sed ex-  
teris etiam famae celebritate notus,  
maximam sibi peperit laudem, ac Ma-

ioribus

ioribus suis immortale decus adiunxit.

¿Ecquis vero res ab eo in Lusitano bello, cum Hipparcum ageret, Equitumve Inspectorem, tam viriliter gestas non dicam exornare, sed percensere possit?


Ego plura, Auditores amplissimi, silentio premam, atque ea profecto sciens, prudensque praetermitam; siquidem nullus unquam Hispaniae locus, nullus etiam Italiae, nulla demum totius quae late patet Europae civitas, nullus angulus de suis laudibus conticescet.

Unde reliquum est, ut vos Milites fortissimi, vos item Equites nobilissimi, verbo dixerim, omnes quibus Hispaniae nomen pulchrum est, ac decórum, reliquum est ut ¡Io! Triumphe! ad tantum Heroa laudibus prosequendum ingeminetis.

¿Mihi enim vero quid superest? Nisi ut finem dicendi faciam, tantique, ac tam praeclari viri patrocínio suffultus in arenam disputationis descendam?

DIXI.





## ORATIO TERTIA.

**E**Rgone in Principe, moribus spectatissimo, satis ut est commendando mihi immorari liceat? Ergo ne illum à generis amplitudine, dignitate, antiquitate laudare possim? Utinam, Viri ornatissimi, quam de rebus theologicis, tam etiam dicendi locum de amplissimo Equite, de iustitiae integerrimo Iudice, de prudentissimo, scilicet, huius Urbis Prorege, hodierna die statueretis! Quam multa, Deus immortalis! Quam eximia, & praeclara, licet incompta oratione, possem, at facili negotio complecti! Primum enim Maiores meminissim, fide, & pietate nobiles, armis inclitos, religione claros, fortitudine insignes, omniumque virtutum genere illustres, si quid vero ad rem pertinet, aere quoque conspicuos. Deinde (quod profecto

fecto orationis scopus esset) Bucareliana proles honoribus macta, atque in aevum omne posteris praedicanda, vestris, vel auribus, vel oculis sisteretur.

Equidem clarissimos Imperatoris Legatos, regiosque Provinciarum Praefectos, & Franciscum Paulaeum, & Nicolaum, & Antonium, germanos fratres, optimam, videlicet, illius propaginis sobolem, Codro certe, atque Sparta generosiores, Vasconia, Gades, Mexicus è vestigio proferrent. Haud etiam Ludovicus suus Hispaliensibus deesset. ¡Superum fidem! ¡Quam ille pius, atque in miseros officiosus! ¡Quam etiam in egenos munificus! ¡Quam benignus! ¡Quam liberalis!

Diem eximerem, si Bucareliae gentis decora, si avitam amplitudinem, si praestantiam, si claritatem, si omnia denique dignitatis stemmata, veteraque monumenta, quibus ornatam iri arbitratus sum, numerando persequi vellem. Vestrum erit, Viri gravissimi, si  
in

in rebus adeo perspicuis testes etiam vocandi sunt, aut Baeticam, aut Hispaniam, aut totam, si mavultis, Europam antestari.

Mihi vero de Maecenatis virtute, de prudentia in re publica administranda, de cura, studio, atque in obeundo sibi delato munere diligentia, apud vos homines in primis disertos, sermo erit per quam brevissimus.

Ecquis igitur tam in rebus erit politicis hospes, & peregrinus, qui huiusce Principis indolem, mitissimum ingenium, urbanitatem, caeteraque, quae maximum, ac praestantem Heroa constituunt, perspecte non noverit?

Mirari subit, Viri amplissimi, quod licet ille adserendae iustitiae Praefectus sit, atque ad huius Urbis Provinciae clavum cum potestate, & imperio sedeat; neque acerbitatem affectet, neque supercilium adhibeat, neque fastum ostendet. Suavis est; sed cum gravitate. Comis est; sed cum maiestate. Frugalis est;

sed

sed cum magnificentia. Atque ut omnia;  
velut uno face, complectar, optimo,  
egregioque Hispaniarum Monarchae  
CAROLO III gratus est quam quod  
maxime.

Plura sunt quae certiores nos faciunt de regia adversus Maecenatem nostrum benevolentia. ¿Quid? ¿Habannensis Portus? ¿Cubana Civitas? ¿Et, quod praestantius est, Mexicanum Regnum nisi viro apud Regem non in postremis habito, atque spectata fide committeretur? ¿Quid?

Sed disserendi tempus prope est. Ergo ab his tandem, velut excuneatus discedam. Adeste dum Viri Theologi: una mecum concedite, ac de Locis Theologicis, quod solentes facitis, maturitate, iudicio, & consilio disserite. Nobis autem demandatam Provinciam sub excellentissimi Maecenatis tutela spes est, nisi vis maior, foeliciter admodum suscepturos.

DIXI.